

Apòkrifë – 35 (Le pomału z tim wiészanim)

Le pomału z tim wiészanim!
Bò sèchëch wietwiów nie sygò...
Zdążita przed Zmartwëchwstanim
Pòkùtną rosą nawilgnać...

Nié wszëtcë narôz! Za régå...
Nôprzódkã swiãti a swiãté
Tec drzewiã wszëtczych nie dwignie,
Cãżôrã grzéchów rozpãknie...

Ti z pierszëch régów nôpiersi
Zrosli ze stótczkã ùrzãdów,
Co czënita lëdzy gòrszich,
Bò niżi są waszëch grzãdów

Dówôta jima nié swòje
Z òdjimków szczerzita zãbë
Tu pòswiãcą bùdacëje
Zôs przetną szlëfã paradno...

Zasadną wòltarzów krótkò
Pòd szlipsã w kòscelnëch ławach
Tej-sej z ambònë przemówiã
Dadzą sã przë tim òbkadzac

Wińdã sã cmùlëc i łasëc
Przëòbiecywac a manic
Kò tak to je w demòkracje:
Nôprzódkã nót nacëganic...

Głosësków czej pònazbierzã
Przësygnã na swòjich bógów
Mańdacëska w gòr'zscach scësna
Zarządów a kòmisëjów

Òd spòrtu, szpòrtu, kùlturë
Zapiszã sã "specjaliscë"
Słëchajã sã synekùrë
W radzëznach pòdług jich listë...

Tedë, czej kòrëtów sygnie
Służbòwëch autów, kòmórków
Fùchów dlô całi familie:
Wùjów, pòłbratów a córków

Mòże, ach mòże tej zbiegnie

Co dlô Francëszków, Anulków
Chiba, że chizni wëprzëgnie
Nie dozdô emeriturków

Abò jich dze jaczé służbë
Ùpitoszą òpòcuszkù
Bò zachcëło sã wëkręcëc
Òd pòdatków, jinëch ZUSków...

(...)

A czedë ju sã narządzą
Na szkòdã biédnëchny Pòlszi
Nazôt ùstawią sã w régach
Do Judasza ùschli krëszczy...

Tómk Fópka, Chwaszczëno, 7 łżëkwiata 2023 rokù, gòdz. 6.43 d.p.